



MOCIÓN URXINDO ACCIÓNS PARA FREAR O XENOCIDIO EN CURSO NA PALESTINA

Olaia Ledo Díaz, portavoz municipal do Grupo Municipal do Bloque Nacionalista Galego (BNG) no Concello de Narón, ao abeiro da lexislación vixente, presenta a seguinte MOCIÓN para o seu debate en pleno :

EXPOSICIÓN DE MOTIVOS

“Petición urxente de axuda: Estamos morrendo. Os bombardeos israelís son implacables. As vítimas son as mulleres e os nenos. Non quedan lugares seguros. Sen comida, sen auga: a fame está espallándose rapidamente. Esta guerra en Gaza debe rematar. Por favor, fagamos que as nosas voces se escoiten antes de que o próximo ataque aéreo nos silencie”.

Esta mensaxe, publicada o pasado 19 de maio en redes sociais, polo xornalista Anas Al-Sharif desde o campo de refuxiados/as de Jabalia e acompañada dunha foto dunha crianza palestina chorando de desesperación, expresa o alcance da catástrofe humanitaria que se padece na faixa de Gaza a causa das accións xenocidas perpetradas polo Estado sionista de Israel.

Só un día despois, o subsecretario xeral adxunto da Organización das Nacións Unidas (ONU) para asuntos humanitarios, Tom Fletcher, alertaba de que de non entrar axuda humanitaria, após máis de dous meses de criminal bloqueio por parte de Israel, 14 mil bebés morrerían en 48 horas. A propia Organización Mundial da Saúde (OMS) xa advertiu de que *“se a situación persiste, agárdase que preto de 71 mil nenos e nenas menores de cinco anos sufran desnutrición aguda nos vindeiros 11 meses”.*

A cidade de Narón, as naronesas e naroneses, non podemos ficar indiferentes nin en silencio diante do alcance e consecuencias do xenocidio que está a desenvolver o Goberno de Israel contra da poboación palestina na faixa de Gaza, que xa provocou máis de 52.259 mortes das que máis de 15 mil foron nenos e nenas. Verificándose na práctica a advertencia lanzada polo secretario xeral das Nacións Unidas en novembro de 2023, poucas semanas despois do inicio da ofensiva militar, nas que alertaba de que Gaza estíbese a converter nun “cemiterio de crianzas”. Engádense, ademais, 117.416 persoas feridas e case 2 millóns de desprazadas á forza (o 90% da poboación). Aliás, 660 mil crianzas fican sen acceso á escola desde outubro de 2023.

Tal e como recolle a Axencia de Nacións Unidas para as persoas refuxiadas de Palestina en Oriente Medio (UNRWA), máis dous terzos (o 69%) da Faixa de Gaza atópase en zonas

de exclusión, baixo ordes de desprazamento activas ou ambas as dúas, sendo arredor de 420 mil persoas as que teñen sido, novamente, desprazadas á forza, desde que Israel rompeu o cesar-o-fogo.

O bloqueo imposto por Israel, non só impide o acceso de axuda humanitaria, senón que provoca deliberadamente escaseza e un inasumíbel aumento, de entre o 150 e o 700%, dos prezos de alimentos e produtos esenciais para a subsistencia. E a destrución xeneralizada e practicamente total de vivendas e infraestrutura crítica xerou aproximadamente 50 millóns de toneladas de entullos.

É por iso que de maneira reiterada a cidadanía de Narón ten expresado con rotundidade o seu masivo rexeitamento a esta agresión xenocida contra o pobo palestino que supón un claro crime contra a humanidade de acordo ao Dereito internacional, tal e como sostén de maneira inequívoca o primeiro fiscal xefe da Corte Penal Internacional, Luis Moreno Ocampo.

A absoluta prioridade é lograr un cesar-o-fogo inmediato e incondicional dos ataques ordenados polo goberno israelí contra a faixa de Gaza, así como a urxente apertura de corredores humanitarios seguros para poder asistir á poboación palestina.

Cómpre, ademais, iniciar un proceso de negociación política con respaldo internacional para procurar unha saída pacífica, xusta e estábel neste conflito que se basee no cumprimento das resolucións das Nacións Unidas.

Por todo o anterior, o Bloque Nacionalista Galego propón ao Pleno do Concello de Narón a adopción dos seguintes **ACORDOS**:

1.Expresar en nome da cidade de Narón o total rexeitamento e condena das accións xenocidas do Estado de Israel na faixa de Gaza e a demanda de paz e liberdade para o pobo palestino, esixindo o cumprimento das resolucións da ONU e do Dereito Internacional Humanitario e garantindo o seu dereito a dispor do seu propio Estado libre e soberano.

2. Declarar persoa non grata a Benjamin Netanyahu e a todas as persoas que fan e/ou fixeron parte do seu gabinete gobernamental desde o 7 de outubro de 2023, pola súa responsabilidade na catástrofe humanitaria provocada en Palestina.

3. Instar ao Goberno español a:

3.1. Facer efectivo o embargo total de armas, acordado polo Congreso, contra o Estado de Israel e aplicar de maneira estrita os tratados e convencións ratificadas polo Estado español para garantir o Dereito Internacional Humanitario.

3.2. Aplicar a inmediata suspensión ou bloqueo de calquera tipo de relación comercial e a ruptura de relacións diplomáticas co Estado xenocida, así como a apoiar de maneira activa as accións da Corte Internacional de Xustiza para que sexan xulgados os criminais de guerra e se poña fin á ocupación da Palestina.

3.3. Promover no seo da Unión Europea e a nivel internacional accións enérxicas para frear o xenocidio en curso na Palestina.

4. Instar á Xunta de Galiza a:

4.1. Suspende calquera cooperación, directa ou indirecta e en calquera ámbito, co Goberno de Israel ou entidades dependentes deste.

4.2. Despregar no ámbito da Acción Exterior unha ofensiva para denunciar o xenocidio en curso en Gaza.

4.3. Suspende de maneira inmediata e resolver todos os contratos públicos da Xunta de Galiza e os seus organismos e entidades dependentes con calquera empresa ligada, directa ou indirectamente, á industria militar e de defensa de Israel.

4.4. Colaborar no envío de axuda humanitaria para a atención da poboación palestina.

5. Instar ao Goberno municipal a:

5.1. Suspende calquera cooperación, directa ou indirecta e en calquera ámbito, Goberno de Israel ou entidades dependentes deste.

5.2. Suspende de maneira inmediata e resolver todos os contratos públicos do Concello de Narón con calquera empresa ligada, directa ou indirectamente, á industria militar e de defensa de Israel.

5.3. Colaborar no envío de axuda humanitaria para a atención da poboación palestina.

Asdo. Olaia Ledo Díaz